



UKA 2017/21

9/10-2017

Nivi Olsen

Namminersorlutik Oqartussat missingiummut uunga isumaqataanissaat pillugu Inatsisartut aalajangiiffigisassaattut Siunnersuut. Kalaallit Nunaanni pinerluttulerinermi inatsimmut allannguutissatut siunnersuut. (Kinguaassiuutitigut pinerluttarneq il.il.)

(Isumaginninnermut, Ilaqutariinnermut, Naligiissitaanermut Inatsisinillu Atuutsitsinermut Naalakkersuisoq)
(Siullermeerneqarnera)

Demokraatini iluarisimaarluinnarparput manna siunnersuut. Kinguaassiuutitigut pinerluttarnerit amerlavallaarujussuarput aamma taamaassimavoq ukiuni amerlaqisuni.

2016-mi nunami maani inuit 1000-iungaangata pinngitsaaliinerit arfineq-marluk nalunaarutigineqartarput. Assersuutigalugu Danmarkimi taannarpiaq 0,7-iuvoq. Allatut oqaatigalugu nunatsinni nalunaarutigineqartartut quleriaammik amerlanerupput. Tamatuma takutippaa ajornartorsiummik suliassaqartugut.

Kinguaassiuutitigut pinerluffigitinneq eqqorneqartumut aserorsaataasarpoq amerlasoorpassuartigullu misigisaavoq sakkortooq inuunerup sinnerani kalinneqartartoq. Inuiaqatigiittut pisussaaffigaarput kinguaassiuutitigut pinerluttartut pineqaatissittassallugit paasinnequllugit, neriutugalugu kingorna taamaalioqqinngisaannassasut. Pineqaatissiinerup naapertuuttup pinerlullutik kanngutsaattuliornissaminnik eqqarsaateqartut immaqa tunuarsimaarnerulersissinnaavai.

Sualummik iluarisimaarparput meeqqanut 12-t inorlugit ukiulinnut kinguaassiuutitigut kanngutsaattuliornerit pinngitsaaliinertut isigineqartalissammata. Tassa imaappoq, meeqqamut kinguaassiuutitigut kanngutsaattuliortut ullumimut naleqqiullugu sakkornerunerujussuarmik pineqaatissinneqartalissapput, tamannalu qujanarpoq.

Demokraatini neriutigaarput, suliniutit pineqartut pissutaallutik, inuiaqatigiinni kinguaassiuutitigut pinerluttartut siunissami ikinnerulerumaartut.

Siunnersuut tapersorsorparput innersuullugulu Inatsisinik atortitsinermut Ataatsimiititaliamut.